

## Morning Regional Dogri News Bulletin, 22 May 2024

मार्निंग डोगरी न्यूज़ बुलेटिन, समें. 09.20 Hrs

<><><><><><>

### Headlines

- उपराज्यपाल मनोज सिन्हा होंरें जम्मू-कश्मीर उच्च शिक्षा परिषद दी बैठक च प्रदेश च शिक्षा दे क्षेत्र च व्यापक ते पूरे पराते बदलाव ते सुधारें बारै सलाह-सूत्र कीता।
- जम्मू दे डिविजनल कमिशनर होंरें रियासी जिले च दिल्ली-अमृतसर-कटड़ा एक्सप्रेस-वे दे कम्मै दी समीक्षा कीती ते जिले च होरनें विकास पैहलें दा बी जायजा लैता।
- मौसम विभाग नै उत्तर भारत च गर्मी दा कैहर अजें जारी रौहने ते जम्मू च इस म्हीने दे खीरै तोड़ी तापमान 44 डिग्री पार करी लैने दी शँका जताई ऐ।
- जम्मू-कश्मीर सरकार नै अपने मलाजमें लेई महंगाई भत्ते दी घोषणा कीती ऐ।

<><><><><><>

### LG-Sinha

लेफ्टिनेंट गवर्नर मनोज सिन्हा होंरें कल राजभवन च जम्मू-कश्मीर उच्च शिक्षा काउंसल दी इक बैठक दी प्रधानता कीती। एल.जी हुंदी प्रधानता आली इस काउंसल नै प्रदेश च शिक्षा खेतर च व्यापक तब्दीलिएं बारै चर्चा कीती। बैठक दौरान प्रदेश दिएं युनिवर्सिटिएं च राष्ट्री शिक्षा नीति 2020 दी अमल आवरी दी स्थिति मतल्लक महत्वपूर्ण मामलें पर बी गल्लबात कीती गेई।

एल.जी होंरें उच्च शिक्षा संस्थानें पर जोर पाया जे ओह 'डिजाइन यूअर डिग्री' जनेय नमें किस्मै दी प्रोग्रामें गी समेबद्ध तरीके कन्नै लागू करोआन। उनें आखेआ जे पाठ्यक्रम च क्लासं च पढाने दे तरीके भलेयां नमें किस्मै दे होने लोड़चदे न तां जे बच्चें अंदर समस्याएं दे हल कइडने दे हुनर विकसित होई सकन। एल.जी हुंदे सलाहकार राजीव राय भटनागर, मुख्ख सचिव अटल डुल्लू वाइस चांसलरें ते काउंसल दे सदस्यें बी इस मौके अपने विचार सांझे कीते ते राष्ट्री शिक्षा नीति ते 'डिजाइन यूअर डिग्री' जनेई पैहलकदमिं दे महत्व पर लो पाई।

<><><><><><>

### Div.Com.Jammu

जम्मू दे डिविजनल कमिशनर रमेश कुमार होंरें रियासी जिले च दिल्ली-अमृतसर-कटड़ा एक्सप्रेसवे दे कम्मै च हासल प्रगति दा कल जायजा लैता। उनें जिले च तरक्कीयाती पैहलकदमिं दी बक्ख-बक्ख सैक्टरें स्हाबै समीक्षा कीती। जिला अधिकारिं दी बैठक दी प्रधानता करदे होई डिविजनल कमिशनर हारें सरबंधत मैहकमें आस्सेआ लागू कीती जा रदी परियोजनाएं च हासल प्रगति बारै जानकारी लैती ते जिले दे विकास बारै हिदायतां जारी कीतिआं। रियासी दे जिला विकास कमिशनर विशेष महाजन होंरें उनेंगी दिल्ली-अमृतसर-कटड़ा एक्सप्रेस वे ते होंरें परियोजनाएं दी स्थिति बारै जानकारी दित्ती। डिविजनल कमिशनर होंरें उनेंगी हिदायत दित्ती जे ओह जमीनां हासल करने ते मुआवजें दी प्रक्रिया च तेजी आहनन तां जे इस महत्वकांक्षी शिड़क परियोजना गी बेल्ले सिर सबूनरा कीता जाई सके।

डिविजनल कमिशनर होरें रियासी थमां रनसू तगर दी शिड़क परियोजना गी जून म्हीने दे अखीरै तोड़ी मुकम्मल करने दा बी हुकम रसाल कीता।

<><><><><><>

### IMD-Heat Wave

भारतीय मौसम विभाग नै इस म्हीने दी 25 तरीक तोड़ी पंजाब, हरियाणा, चंडीगढ़, दिल्ली, उत्तर प्रदेश, राजस्थान ते मध्य प्रदेश च बड़ी मती गर्मी रौहने दी भविक्खवाणी कीती ऐ। मैहकमे दा आखना ऐ जे अगले दऊं दिनें तोड़ी दक्खन पूर्वी अरब सागर दे किश हिस्सें, मालदीव कामोनि इलाके ते बंगाल दी खाड़ी दे दक्खनी हिस्सें दे कन्नोकन्नी अंडमान-निकोवार द्वीप ते अंडमान सागर च दक्खन पच्छमी मानसून लेई साजगार स्थिति बनी दी रौहग। इस करी दक्खनी भारत च शुक्रवारें तोड़ी भारी थमां भारी बरखा बरने दे ते केरल च कल्लै तगर भारी बरखा बरने दे आसार जताए गे न ते अगले दऊं त्रऊं दिनें च तमिलनाडू, पुदुचेरी, करायकल, केरल, माहे ते कर्नाटक च मती भारी बरखा दी संभावना ऐ। मौसम विभाग नै भारत दे मध्य ते उत्तर पच्छमी इलाके च अगले किश दिनें तगर तापमान च 2-3 डिग्री सैल्यिस दा बाददा दर्ज होने दी शेंका जताई ऐ।

<><><><><><>

### Weather

मौसम विभाग नै आखेआ ऐ जे मंदरें दे शैहर जम्मू च तापमान मई म्हीने दे खीरै तोड़ी 44 डिग्री सैल्यिस कोला उप्पर जाई सकदा ऐ।

पिछले किश दिनें थवां जम्मू दे तापमान च उप्परोतली बाद्दा होआ रदा ऐ जेड़ा अज्ज-कल्ल 41 सोयां 42 डिग्री दे कोलकाल चला रदा ऐ। मैहकमे नै अगले कोई इक हफते तगर बरखा बरने दे कोई आसार नेई दस्से न ते मौसम आम तौर पर खुशक गै बने दा रौहग। मैहकमे नै अगले कोई इक हफते तगर बरखा बरने दे कोई असार नेई दस्से न ते मौसम आम तौरा पर खुशक रौहने दी तवक्को ऐ। औदे किश दिनें च पारा 44 डिग्री या एहदे शा बी उप्पर जाई सकदा ऐ। उआ किश टांवी-टांवी थारें बिच्च कुदरै ब्हा-झुल्लने या हल्की कनी कनोन दी संभावना थमां बी इंकार नेई कीता ऐ।

<><><><><><>

## DGP

जम्मू-कश्मीर दे पुलस महानिदेशक आर.आर स्वैन होरें कल जम्मू जोन दे रियासी जिले दा दौरा कीता ते श्री माता वैष्णो देवी ते श्री शिवखोड़ी यात्रा अस्थानें दे सुरक्षा स्थिति दी समीक्षा कीती। जिला पुलस लाइन्स रियासी च लग्गी दी इस जायजा बैठक दे बाद डीजीपी होरें जवानें ते पुलसै दे अधिकारिणं कन्नै गल्लबात कीती ते आम जनता दिणं पुलसै कोला आसं-मेदें गी उजागर कीता। गल्लबात दौरान अपने संबोधनै च स्वैन होरें आखेआ जे पुलसै दी वर्दी लाना इक बड़ी मानै आली गल्ल ऐ ते एह वर्दी लाइए जेहड़ी जिम्मेदारी स्हाड़े मूहंडें पर औंदी ऐ ओह ऐ पूरी निष्ठा कन्नै जनता ते समाज दी सेवा करना।

उनें आखेआ जे पुलसै दे हेठले कोला लेइए सब्बनें शा उप्परले रैंक दे कर्मी दा एह फर्ज ऐ ते समाज दी सुरक्षा लेई आतंकवाद दा मकाबला, नशे दा कारोबार करने आले दी नकेल कस्सने, अपराधे पर रोक लाने, लोड़मंद लोकें दी मदद करने ते होर दुए सब्बनें कम्मं ते जुम्मेवारिएं गी पूरी निष्ठा ते तनदेही कन्नै निभान।

<><><><><><>

### Vice-President

राष्ट्रपति जगदीप धनखड़ होर अज्ज इरान च जांगन। उपराष्ट्रपति होर ईरानी राष्ट्रपति डॉ. सैयद इब्राहिम रैयसी, विदेश मंत्री डॉ. जोसीन अमीर, अबदोलिहान ते बाकी इरानी अधिकारियें दे 19 मई गी हैलीकाप्टर क्रैश होने कारण आक्समात मौत होई जाने पर औपचारिक तौरा पर खीरी रस्मात च शामिल होंगन। उआं कल विदेश मंत्री एस. जयशंकर होरें बी नर्मी दिल्ली च ईरानी एम्बेसी च शिरकत कीती ते इस अक्समात ते दुखद घटना लेई बसोस प्रगट कीता। इक सोशल मीडिया पोस्ट च जयशंकर होरें आखेआ जे उनेंगी म्हेशां भारत दे दोस्त दे रूपे गै चेता कीता जाग जिनें भारत ते ईरान दे सरबंधें गी मजबूत बनाने च महत्वपूर्ण योगदान दिता।

<><><><><><>

### Dearness-Allowance

केंद्र शासित प्रदेश जम्मू-कश्मीर दे खजाना मैहकमे नै कल सरकारी मलाजमें दे महंगाई भते यानी डी.ए. च 4 प्रतिशत दा बाददा करने दी घोषणा कीती ऐ। आकाशवाणी दे जम्मू संवाददाता मुजब 2024 दे सरकारी हुकम नंबर 8-एफ च एह फैसला पैहली जनवरी 2024 कोला लागू होग। यू.टी मलाजमें दी तरमीम करिए डी.ए दी दर हुन म्हीने दी बेसिक सैलरी दा 50 प्रतिशत होग।

डी.ए च एह बाददा 7में तनखा आयोग दी सफारश मुजब नियमित तनखा पर कम्म करने आले सब्बनें मलाजमें गी नमें डी.ए दी अदायगी मई 2024 च नकद कीती जाग जेदे च जनवरी कोला अप्रैल दा एरिअर बी शामिल होग। बधे दा डी.ए गी म्हीने-म्हीने दी तनखा दे हिस्से दे रूप च शामिल कीता गेआ ऐ ते एहदे च कोई होर विशेष वेतन किस्म शामिल नेई ऐ।

<><><><><><>

### DC-Jammu

जम्मू दे जिला विकास कमिशनर सचिन कुमार वैश्य होरें कल इक बैठक दी अध्यक्षता करदे होई विपदा च फंसे दे ते माड़े हालात च रवा करदे बच्चें दे पुनर्वास बारै कार्ययोजना तैयारक रने लेई सलाह सूत्र कीता। इंदे च भिक्ख मंग्गने आले, बेस्हारा ते कुसै होर विपदा दे मारे दे बच्चे शामिल न। डी.सी होरें अधिकारिणं गी निर्देश दित्ता जे इस कार्ययोजना गी मती तरजीह दिंदे होई एहदा मसौदा तैयार कीता जा। उनें ऐसे बच्चें ते उंदे परौआर आलें गी प्रेरित करने पर जोर दित्ता जे ओह इनेंगी गलिएं फिरने गी नेई छोड़न ते प्रशासन आससेआ इंदी भलाई बेहतरी ते आसरमे लेई उपलब्ध सुविधाएं दा फैयदा ठोआन। बैठक च बच्चें दी सेहत जांच, नां दर्ज करने ते बक्ख-बक्ख मैहकमें तैहत होने आले कम्मं कारवाइएं दी प्रक्रिया दे बारे च तफसीली चर्चा कीती गई।

<><><><><><>

## DC-Samba

सांबा दे डिप्टी कमिशनर अभिषेक शर्मा हारें कल डी.सी दफ्तर दे कांफ्रेंस हाल च कल सीमा सुरक्षा बारै लाई गेदी इक बैठक दी प्रधानता करदे होई अंतरराष्ट्रीय बन्ने दे नेड़े सुरक्षाबलें ते आम लोकं गी दरपेश मसलें पर चर्चा कीती। बैठक दौरान सिंचाई ते हाड़ें दी रोकथाम सरबन्धी विभाग ते ग्रामीण विकास विभाग आस्सेआ अंतरराष्ट्री बन्ने दे नेड़े चलाए जा रदे ते प्रस्तावित प्रोजेक्टें बारै बी चर्चा कीती गई। डिप्टी कमिशनर हारें तारबन्दी दे परली बक्खी रड़ लेई करसानें गी बेल्ले सिर मंजूरी देने, चारा किट्ठा करने लेई डेयरिएं दी शिनाख्त करने, श्रमिकें दी तसदीक, करसानें गी दिती गेदी मंजूरिएं दे रिकार्ड तैयारक रने ते उंदे रक्ख-रखाव दी जरूरतें पर जोर पाया। उनें निर्देश दिता जे करसानें गी बन्ने आले इलाकें च ड्रोन यां सुरंग बारै जानकारी देने मतल्लक ईनाम योजना बारै जानकार बनाया जा।

<><><><><><>

## SVEEP-Rajouri

राजौरी दी स्वीप टीम आस्सेआ कल मतदाताएं गी जागरूक बनाने लेई इक बड्डी रैली दा सरिस्ता कीता गेआ जेदे च जिले दे बक्ख-बक्ख शिक्षा इदारें थमां खरी मती गिनतरी च विद्यार्थिएं ते स्कूली अमले नै हिस्सा लैता। इस रैली दा सरिस्ता जिला चुनां अधिकारी ओम प्रकाश भगत हुंदी निगरानी हेठ कीता गेआ। एह रैली राजौरी दे बक्ख-बक्ख इलाकें चा होइयै लंग्घी ते विद्यार्थिएं आम लोकं गी स्वीप सरबन्धी संदेश बारै जागरूक बनाया।

उनें लोकतंत्र गी मजबूत बनाने च मतदाताएं दी शमूलियत उप्पर लो पाई ते युवा खड्ढारिएं ते विद्यार्थिएं पर जोर पाया जे ओह मतदाताएं गी इस बारै जानकार बनान।

<><><><><><>

### Traffic-Resumed

किश दिनें तोड़ी बंद रौहने दे बाद जम्मू-श्रीनगर राश्ट्रीय जरनैली सड़क एन.एच-44 पर गड्डिएं दी आओजाई ब्हाल होई गेई ऐ। अज्जै थमां हर किस्मै दी हौलिएं गड्डिएं जिंदे च प्राइवेट ते यात्री गड्डियां बी शामिल न, गी जम्मू थमां घाटी ते घाटी थमां जम्मू आली बकखी जाने दी खुल्ल ऐ। उआं हौलिएं गड्डिएं दे लंग्गी जाने ते सड़कै दी स्थिति दा जायजा लैने दे बाद बड्डी गड्डिएं गी जखैनी उधमपुर थमां अग्गे श्रीनगर आली बकखी जाने दी खुल्ल दिती जाग। दलवास, पंथयाल, मगेरकोट, नचलाना, शानगढी ते किशतवाड़ी पत्थर इलाके च सिंगल रोड गी ध्यानै च रखदे होई हौलिएं गड्डिएं लेई बी कट आफ टाइमिंग तैह कीती गेदी ऐ।

<><><><><><>